

Il master da tgira – la chombra pitschna è sceptica

Reglar en l'entira Svizra las professiuns da sanadad

DA CLAUDIA CADRUVI / ANR

■ **Las professiuns da sanadad sin il stgalim dal bachelor vegnan unifitgadas. Il cussegl dals chantuns ha approvà ier la lescha. El ha refusà dad integrar il master da tgira en la lescha. Sulet per l'osteopatia è prescrit in master.**

Sco professiuns da sanadad en il senn da la lescha valan tgirunzas, spenderas, cussegliastras da nutriment, fisioterapeutas, ergoterapeuts, spezialists per egls ed osteopats. Lur scolaziun e las pretensiuns per cumpetenzas duain vegnir unifitgadas en l'entira Svizra. La lescha regla la reconuschientscha da diploms da l'exteriur ed introducescha in register per questas clamadas. La finamira è d'augmentar la segirtad per ils pazients.

Anc nagin master per tgira

Da discutir ha dà schebain ins duess integrar, sper il master per l'osteopatia, er in master da tgira. Gliez na portia nagut per la segirtad dals pazients, ha ditg *Jochim Eder* (pld/ZG). I muntia mo ina academisaziun che saja cumbinata cun dapli prestige e pli autas pajas e che custia consequentamain dapli. Sch'i sa sviluppeschia pli tard in cler profil da professiun per in master da tgira possian ins anc adina integrar quel en la lescha.

Las associaziuns professiunalas hajan gjavischà il master ch'ins dovria cunzunt en cas da tgira fitg cumplitgads u per pazients cun malsognas cronicas, ha ditg *Paul Rechsteiner* (ps/SG). Che ina tgirunza cun in master custia dapli sa chapeschia da sasez. Ils temps che la tgira vegniva prestada da dunnas a moda carita-



Dapertut tuttina: Las reglas da scolaziun e pratica en las clamadas da sanadad duain vegnir unifitgadas en Svizra.

KEYSTONE

tiva sajan passads. Tgirunzas sin il stgalim dal master pudessan distgargiar ils medis, ha ditg *Werner Luginbühl* (pbd/BE). Empè da scolar ina massa chars medis pudessan ins promover questa furmaziun. La chombra pitschna n'ha betg sa laschè persvader ed ha refusà cun 20 cunter 18 vuschs il master per tgira en la lescha.

In register da tgirunzas e spenderas

Autras disposiziuns èn stadas incontestadas: Scolas che vulan porscher furmaziun da sanadad dovran in'accrediziun. Tgi che vul pratitgar en atgna responsabladad dovra ina lubientscha dal chantun. Diploms da l'exteriur vegnan reconuschids sch'els valan sco equivalentes als diploms svizzers. Tgi che violescha la le-

scha sto quintar cun in avvertiment, cun ina reprimanda u cun in chastu d'enfin 20 000 francs. En cas grevs relascha la surveglianza chantunala in scumond da pratitgar la professiun.

L'Uffizi federal per sanadad maina in register da las professiuns da sanadad. En quel figureschan tut las personas cun ils diploms descrits. Las autoritads chantu-

nalas annunzian al register mesiras disciplinaras, chastis u scumonds da pratitgar.

Il cussegl naziunal ha da tractar sco segunda chombra la fatschenta.

In register naziunal per cancer

(sda) La Svizra survegn in register naziunal per cancer. Er il cussegl dals chantuns beneventa l'introducziun d'ina tala banca da datas. La chombra pitschna ha approvà sco segunda chombra unanimamain il project.

Malsognas dal cancer duain vegnir registradas en l'avegnir en l'entira Svizra a moda eguala. Il register maina datas da basa davart la persuna, la diagnosa, l'emprim tractament ed il decurs da la malsogna.

Il register serva a la prevenziun, duai gidar a diagnostitgar ad uras e duai gidar a meglierar il tractament. Igl è prevedì ch'ils spitals e medis ston annunziar ils cas da cancer al register chantunal. Lez maina vinavant las datas en furma anonimadas al register naziunal. En monitorings annuals e rapports pli approfondads duain las datas vegnir evaluadas.

«En Svizra survegnan mintg'onn 38 000 umans cancer», ha ditg il minister da sanadad *Alain Berset*. «Passa 16 000 umans moran mintg'onn da la malsogna.» Intgins chantuns e singulas vischnancas enconuschan gia in register da cancer.